

(<https://news.usm.my>)

Berita Mutakhir

26  
JAN

## USM-NCIA TERUS PERKASA AGENDA PEMINDAHAN ILMU NASIONAL



USM, PULAU PINANG, 26 Januari 2017 - 'Pembangunan Berteraskan Kesaksamaan Sosial' diangkat sebagai tema pertemuan dialog bersemuka antara Perdana Menteri Malaysia Dato' Seri Najib Tun Razak dengan peserta projek NCIA-USM di bawah program Community Innovation Centre (CIC-KTP) iaitu Projek Pengupayaan OKU dalam perusahaan Jeli Kelapa, CIC Lekir dan Projek Penternakan kelulut melalui inovasi Mustafa Hive di CIC Sik Kedah, CIC Jerlun Kedah dan CIC Kubu Gajah, Perak.

Program CIC yang bermula pada tahun 2015 merupakan roll-out Program Pemindahan Ilmu Nasional yang diletakkan di bawah Pusat Pemindahan Ilmu (KTP), TORAY-USM Knowledge Transfer Centre yang diketuai oleh Pengarah KTP Profesor Dr. Haslan Abu Hassan dan Penyelaras program CIC Syed Yusof Syed Kechik.


Menurut Haslan, dalam sesi bersama Perdana Menteri ini, peserta telah berkongsi bagaimana penyertaan projek ini telah meningkatkan pendapatan mereka melalui aktiviti pemindahan ilmu dan inovasi menerusi ahli akademik USM dalam pembangunan komuniti yang disokong pembiayaan projeknya oleh Pihak Berkuasa Pelaksanaan Koridor Utara (NCIA).



"Hasil daripada projek ini juga turut membawa kepada limpahan ekonomi kepada komuniti sekeliling iaitu penglibatan 15 orang peserta OKU bagi Projek Pengupayaan OKU dalam perusahaan Jeli Kelapa dan penglibatan 45 orang peserta bagi Projek Penternakan kelulut.

"Penambahan peserta projek akan terus dilakukan melalui strategi National Blue Ocean Strategy (NBOS) iaitu memanfaatkan Konsep Shared Value (SVC) antara agensi yang terlibat iaitu Jabatan Tenaga Kerja Perak, Jabatan Pertanian, FAMA, Jabatan Kebajikan Masyarakat dan Honey Gold Lab," jelasnya.

Tambahnya, antara ilmu yang telah dipindahkan oleh ahli akademik terlibat ialah bagaimana inovasi Mustafa Hive dapat menyumbang kepada kelestarian industri penternakan lebah kelulut di Malaysia, proses memanjangkan jangka hayat produk, pembungkusan produk dari kaedah konvensional kepada yang lebih baik, keusahawanan dan pemasaran dalam industri.



"KTP yang juga merupakan sekretariat Program Pemindahan Ilmu Nasional akan terus berusaha menyumbang dalam pembangunan ekonomi negara melalui program sedia ada dan baru antaranya kini sedang membangunkan sistem direktori kepakaran yang mengumpulkan maklumat kepakaran ahli akademik Universiti Awam (UA) dalam aktiviti pemindahan ilmu agar ianya dapat dimanfaatkan," ujarnya.

Teks: Hafiz Meah Ghouse Meah



Share This

